

14
DISSERTATIO MEDICA

De

SINGULARIBUS,

Quam

Loco Disputationis Ordinariae
publicè ventilandam

proponit

D. Gottfried Belsch / Facultat.

Medic. Senior, Pathol. Profes. Publ. Major. P.P. Col-
legii Collegiat. Academ. Decem-Vir, & Reipubl.
Patr. Physicus Ordinarius,

RESPONDENTE

M. MICHAELE Ettmüller /
Lipsiensi, Med. Candidat.

ad D. 2. Octobr. M. DC, LXIII.

Horis Locoque solitis.

LIPSIÆ,

Impensis NICOLAI SCIPIONIS.

JESU JUVA!

Singularare hactenus in *Praxi Medica* fuisse, quod Morborum, nisi omnium, plerorumque tamen Curatio, non amplius ex præscriptâ & receptâ *Dogmaticorum Methodo*, sed vel solo, vel maximâ tamen ex parte, *Singularium* ita dictorum usu, à non paucis passim tractaretur, neminem esse, auguror, quem lateat; Quod ipsum tamen cum Bonis, Eruditis, ac *rationalibus Medicis* omnibus, vel ex eo tantum maximè suspectum videatur, quod *Singularium* ita dictorum *Natura*, & *agendi*, ac *Operandi Vis*, ipsos ut plurimum non minus Autores, & Inventores non paucos, quàm alios Eruditos quosvis, latere penè, persuasum pariter, ac compertum esset; placuit hac vice, dum, *Ordinariam* habere *Disputationem*, Ordinis ratio me jubet, de *Verâ ac Genuinâ Singularium Naturâ*, hoc tantum proferre, quod, nisi essentiam, & formalitatem *Ipsorum* planè ac purè exhauriat, Doctioribus tamen aliis, in hanc subjectam materiam penitus inquirendi, & Publicæ adeo Agrotantium salutis benè, ac salutariter prospiciendi, ansam præbeat.

Ut autem in *Publici* gratiam, & *Veritatis* studio, id tantum dicar, quod verum est, faxit *Sc.* qui ipse *Solus est Veritas*!

THESIS I.

Ad Rem ergò accedens circa Etymologiam pluribus non sum sollicitus, quàm quod dicam, *Singulare*, Vi Nominis, id denotare, quod singulariter inhærere, vel ita inesse alicui dicitur, ut nulli alii commune sit; atq; adeò in *Foro Medico* id significare videatur, quod ab specie, vel formâ latentis alicujus inhærentiæ, hoc est, *Singulari*, & sibi propriâ Vi, Virtute, efficaciâ, & proprietate, aliquid agat, faciat, efficiat.

THESIS II.

Ita, ut inter *Arcana*, *Secreta*, *Specifica*, & *Singularia* dicta (*Panas* enim propriè sic dictas cum *Dogmaticis* planè rideo) quandam

Differentiæ rationem dare, non fit difficile: Scilicet *Arcanum*, & *Secretum*, propriè loquendo, *Autorem* præprimis, ac *Inventorem* suum *Specificum* verò *Partem* in morbis *Affectam*, ipsiusq; *Robur*, præcipue respicere videtur;

THES. III.

Singulare autem describo, quod sit *Medicamentum*, quod, legitime adhibitum, *Singulari* planè *Vi*, ac proprietate, huic vel illi p. n. *Affectui*, remedium dicitur.

THES. IV.

Et quamvis non ignorem, dari etiam in *Parte Dieteticâ* plurima, quæ, præter *Alimentosam* qualitatem, *Vi* propriâ, ac insitâ quadam proprietate, non tantum huic, vel illi humani corporis parti, præ aliâ amica, sed & quibusdam p. n. *Affectibus* inimica sint; Cum tamen *Vis* hæc *Alimentis* non competat, quatenus simpliciter alimenta sunt, sed quatenus sunt alimenta *Medicamentosa*, h. e. quæ, præter alimentam facultatem, de alterandi etiam *Virtute* aliquid participant; ideoque *Singularia* quævis ad *Fontem Pharmaceuticum* refero.

THES. V.

Medicamentum ergò dicitur, quia *Corpus nostrum*, alterando, in *Statu Præternaturali* ad *Naturalem* reducere aptum est; Et dividitur ut quævis *Medicamenta* aliâ, in *Simplex*, & *Compositum*; *Simplex* est quod vel planè per se, vel leviter tantum præparatum, usurpatur. *Compositum* verò, quod cum aliis ingredientibus, vel paucioribus, vel pluribus mixtum, & lege *Artis*, in hanc, vel illam formam redactum est; Ac quamvis, & *Autoritate*, aliorum, & *Rationibus* probare satis possem, *Simplicia* tantum *Vera* esse, & dici *Singularia*, nihilominus tamen de *Compositis* impræsentiarum solum sermo est, partim, quia de *Simplicibus* nullum est dubium, partim verò, quia *Moderna Singularia* ut plurimum *Omnia* sunt *Composita*.

THES. VI.

Nec latere oportet, esse non pauca *Externa* (*Topica*, vel *Localia* dicta) quæ & ipsa, in *Morborum Curatione*, suâ proprietate, ac *Singulari Virtute* non carent, ea propterea planè excipere quidem nolo; hæc tamen, quæ impræsentiarum de *Singularibus* dicentur, de *Internis* præcipue intelligo;

THES. VII.

Porro autem, cum interna Medicamentorum *Singularium* forma, à qua *Ipsorum* promanare debet *Operationis Singularitas*, non in *Primarum*, nec *secundarum qualitatum mixturâ*, sed in *singulari ac peculiari quadam vi, ac proprietate*, quæ propterea *Singularis* vocatur, consistere dicatur; Nodum in Scirpo quærere, non videbor, si in *Singularis* istius *virtutis*, & *Efficaciæ Ideam, Naturam, ac Rationem* inquiram accuratius; Soli enim, & hæc in parte *Experientiæ* (quæ fallax) fidem habere, periculosum; *Experientiæ* verò *Rationem* conjugem addere, tutius, & quemadmodum illud *Empirici*, ita hoc *Rationalis* Medici, nota est; Hipp. Sect. 1. Aph. 1.

THES. VIII.

Quod ut fiat, genuinam *Singularis* istius *Virtutis* *Rationem* ex reliquis, in *Descriptione Singularium*, allatis Verbis, depromere fas est. Dicitur enim, *Singulare* esse *Medicamentum*, quod *singulari Vi, ac proprietate*, huic, vel illi remederi dicitur, p. n. *Affectui*; Jam ergo cum p. n. *Affectus* (πᾶσι & Græcis, vel πᾶσιμα) in genere *Res p. n.* Galen. Com. Omnes (καλεῖται τε παθήματα πάντες οἱ Ἕλληνες, ὅτι τῶν δὲ φύσιν ἐν τῇ in libr. 1. Epidem. πῶς σῶμασιν ἡμῶν γίνεσθαι) denotet, & *Morbum*, ejusq; *Causam*, & *Symptoma* respiciat: manifestum esse, existimo, *Singulare* quodlibet, suâ *singulari Vi, & proprietate*, vel *Morbo* solum, vel ejus *Causæ*, vel *Symptomati*, distinctim; vel omnibus insimul, & conjunctim, remederi debere.

THES. IX.

Cum enim *Medendi Methodus*, à qua *Methodici & Rationales* dicuntur *Medici* ab *Empiricis*, & *Agyrtis* quibusvis distincti, in primo statim cujusvis *Curationis* accessu, communi *Lege*, & *Regulâ* illud, quod p. n. in *Corpore humano* est, tollendum esse, præcipiat, præter *Morbum* verò, *Morbig*, *Causam*, ac *Symptoma*, nihil detur, quod p. n. in *humano corpore* & fieri, & generari, vel colligi, vel retineri, vel ab extra ipsi accidere possit; constat sanè, ad hæc ipsa quodlibet *Singulare* restringi debere.

THES. X.

Jam verò, si omnia, & *Morborum* pariter, ac eorundem *Causarum*, & *Symptomatum* intuear *Genera*, accuratæq; ipsorum cognitioni, *Veram*, ac *Rationalem* adjungam *Medendi Methodum*, *Remediaq;* omnia

omnia, per *Indicationes*, tanquam certa, ac unica *Methodi instrumenta*, indicata, atq; inventa, Rationali lance expendam, Autoritate omnium *Methodicorum Practicorum* manifestum esse, experior, ex Classe *Rerum p.n.* nullam planè esse, cui *Ars* nostra ex *Lege Methodi*, suum non destinaverit, ac surrogaverit competens, & indicatum *Auxilium*, & *Remedium*.

THES. XI.

Sic (sed breviter) *Morbis Intemperiei* sua satisfaciunt *Alterantia*; *Morbis totius Substantie* dictis *Bezoardica*, & *Alexipharmaca*; *Morbis Conformationis*, & quidem, qui præsentem præprimis scopum respiciunt, *Obstructionibus* puta, *Digestiva*, *Aperientia*, & *Præparantia*; *Duritiei*, *emollientia*; *Mollitiei*, *indurantia*; *Tensioni*, *relaxantia* &c. *Morbis Solutæ Unitatis*, *Maturantia*, *Sarcotica*, *Glutinantia*, *cicatricem Inducentia* &c.

THES. XII.

Morborum causas, pro *Indicantium* ratione, & diversitate, removere satagit *Methodus*, per *Vomitoria*, *Purgantia*, *Diaphoretica*, *Diuretica*, *Sternutatoria*, *Expectorantia* &c. Utpote quibus auxiliis *causam Morbificam*, per *Vias* nostri *Corporis* publicas, & privatas, exturbare, & removere *Ars* docuit.

THES. XIII.

Symptoma tandem omne, ut notum est, vel, curatò *Morbò* sponte remittit; vel, si *Morbi*, aut *Causæ morbificæ*, *naturam* induat, nec ipsum suis competentibus destituitur *Remediis*.

THES. XIV.

Quæ ipsa dum perpendo, insimulq; considero, quod *Medicorum* nullus, qui *Methodicè*, in *Morborum* Curatione, procedere nititur, quicquam *Agrotantibus* suis eutò ac rationaliter ordinare, vel præscribere possit, nisi, quod ab *Indicante* aliquo, *Lege Methodi*, indicatum, & à *Ratione* & *Experientia* approbatum sit; dubius hæreo, quodnam *Singularium* dictorum sit *Indicans*? ita, ut primo hocce intuitu ipsa *Singularium* existentia valde habeatur dubia.

Galen. l. 2.
Meth. Med.

THES. XV.

Facile equidem recordor; Amplissima ista *Mineralium*, *Vegetabilium*, & *Animalium* Regna, insignem *materia Medica* suppeditare nobis copiam, in eâq; plurima suggerere *Medicamenta*, quæ, præterquam

quàm quòd, vel *alterandi*, vel *aperiendi*, vel *purgandi* Vim &c. in *Toro* obtineant, peculiari insuper Ratione, ac insitâ quâdam proprietate, huic vel illi corporis humani *Parti* amica magis, ac familiaria sint, quàm aliis, & propterea etiam *Appropriata* vocari assolent; quâ ratione *Cephalica*, *Capiti*; *Thoratica*, *Pulmonibus*, & *Pectori*; *Cordialia*, *Cordi*; *Epatica*, *Epati*; *Splenetica*, *Lieni*; *Stomachica*, *Ventriculo*; *Hysterica*, *Utero* &c. familiaria, amica, & *Appropriata* dicuntur.

THES. XVI.

Nec latet, dari in specie inter *Corroborantia* Medicamenta, quæ & ipsa peculiari proprietate, hanc vel illam *Partem Nobilem* respicere magis, magisque reficere solent, quæ proinde, propriè loquendo, *Specificæ*, & cum adiectione, *Cordialia*, *Cephalica*, *Stomachica* &c. dicuntur; item inter *Purgantia*, quæ omnes quidem humores movent, alia tamen in specie *Bilem*, alia *Pituitam*, *Melancholiam* alia, alia *Serosos humores* evacuare dicuntur, & propterea *electivè Purgantia* vocantur; quæ tamen omnia, in *Methodicâ Morborum Curatione*, sua habent *Indicantia*.

THES. XVII.

An verò *Appropriata* hæcce nostra (*Veteribus* etiam non incognita) sive sint *Alterantia*, sive *Specificæ Confortantia*, sive *electivè Purgantia*; Et *Modernorum Singularia*, dicta, unum, idemque sint? Non immeritò quæritur; utpote in quo ipso, totius controversiæ status consistere videtur.

THES. XVIII.

Sunt autem omninò Unum, & Idem; Vel non sunt; Si sunt unum, & idem, cur præter necessitatem multiplicantur, cur confunduntur *Artis Termini*? Si non sunt Unum, & Idem, nec eadem etiam utrumque erit *Virtus*, *Vis*, & *Operatio*; & consequenter *Singularia* dicta, nec *Alterando*, nec *Evacuando*, & *causam Morbi removendo*, nec *confortando*, sed *aliâ quâvis*, ac *Singulari planè*, & *occultâ ratione*, suam operationem exferere, morbosque per quoddam, quasi *ro* *Seior* depellere, dicendum est;

THES. XIX.

Ut res clarior fiat, pōno casum: Petrus & Johannes, Adolescentes biliosi, corripiuntur Febre Tertianâ Intermittente, & restituitur uterque; Illius Curationem suscepit quidam Titius, Hippocraticis, & Gale-

Galenicis fundamentis nixus: Hujus verò quidam *Sempronius*, merà *Singularium fiduciâ* fretus; Patientes restituti quærunt singuli à suo Medico rationem Curandi, ac Methodum; *Titius* respondet; Ego, cum animadverterem, adesse Febrem, eamq; Tertianam Intermittentem, *Lege Methodi Medendi* formavi meas *Indicationes*; *Febris* autem, ut intemperies calida cordis, & totius corporis, indicavit mihi *Alterantia*, eaq; *Refrigerantia*; *Febris* verò *causa*, humor scilicet Bilius putrescens, remotionem sui, per *evacuantia*; Utriq; ergò *Indicationi* satisfactorius, diætâ præscriptâ, ex fonte Pharmaceutico, & Chirurgico, convenientia desumsi Remedia; *Intemperiem* alteravi refrigerantibus, iisq; appropriatis, & præsertim Epaticis &c. *Humorem biliosum* peccantem αω, per vomitum, convenientibus Emeticis; κατω, per alvum, & quidem per ἐμμεγαν, & diebus intermittentibus, Cholagogis, electivè purgavi; secavi venam; reliquias, prout naturæ tulit motus, per urinam, diureticis, vel per habitum Corporis, benignis discussi diaphoreticis; Febrilium non minus, si quæ interea urgere vidi, Symptomatum rationem habui sedulò; viresque, pro rei necessitate, & urgentiâ, corroborare pariter allaboravi; & hac ratione remiserunt Paroxyismi, cessavit febris ipsa, & cum ea omnia Symptomata; atque ita integrè restitutus est meus Patiens.

Sempronius contra respondet: Ego Hippocraticas, & Galenicas istas ambages non curo; sed longè breviori, ægrotantibusque grata magis, ac jucunda via, procedere soleo; quapropter febricitanti meo, ex *Singularibus* meis, *Antifebrile* meum misi, illudq; paulò antè instantem Paroxysmum, in aquâ meâ febrifugâ, exhibere jussi; quo *Singulari* meo ter assumpto, perfectè curatus est meus febricitans.

THES. XX.

Jam si utriusque Curationis ratio, & relatio à Collegio, vel Facultate quadam Medicâ, Collegialiter, & ex *Artis fundamentis*, & absq; omni affectu examinari deberet, non aliam sanè expectarem sententiam, quàm quòd *Prioris* Curatio fuerit conveniens, vera, & Methodica; *Posterioris* verò inconveniens, suspecta, & Empirica; Ille enim Curationem suam, lege *Artis*, suscipiebat, nihilque nisi quod per *Indicantia*, pro *Febris*, ipsiusq; *Causæ* remotione indicatum erat, εὐμεθόδως ordinabat; Hic verò, missa omni Methodò, missis indicationibus, solo suo *Singulari Antifebrili*, se febrem curasse, jactitat.

THES. XXI.

Si quæret rationem hujus Sententiæ à *Facultate Medicâ Sempronius*; ita forsitan ipsi respondebitur: *Quæcunq; febris curatio non est conveniens veræ medendi Methodo, illa falsa, mala, suspecta, Empirica, & periculosa est; Sed tua Curatio, dum Johannem febre tertianâ laborantem solo tuo Singulari Antifebrili curâsse jactitas, non est conveniens veræ medendi Methodo; Ergo.*

THES. XXII.

Veritas Majoris non tantum tot Seculorum experientia, sed & Autoritate Principum Medicorum nititur; Oportet enim, inquit Hippocrates, se ipsum præstare opportuna facientem (hoc est, Metho- Sect. 1. Aph. 1. dicè procedere;) & scire oportet Medicum, opponere se contrarium libr. de Na- instantibus, & Morbis, & Naturis, & Ætatibus, & Temporibus, & dis- tur. human. tenta solvere, & soluta distendere; sic enim vel maximè morbum seda- verit; & mihi sanè (pergit Venerandus Senex hoc ipsum (scilicet si Galen. libr. fit, quod ex Arte, & Methodi Lege fieri debet) Sanatio esse videtur; Introduct. Medendi autem Methodus partium Medicinæ omnium, ut ordine postre- lib. 4. Meth. ma, sic certè fine, & effectulongè utilissima, ac veluti reliquarum o- Med. mnium finis est; Methodus autem est via quædam universalis, quæ o- libr. 2. Meth. mnium particularium communis sit; finis verò ipsius est, cujusq; morbi Med. invenire Remedia.

THES. XXIII.

Minorem jam olim Galenus probâsse legitur, dum ait: Metho- lib. 4. Meth. dus quædam privata est sanandi, in singulis morbis, commune tamen in Med. omnibus genus unum est; Auspicari namq; perpetuò oportet (arrige aures Pamphile! perpetuò oportet, inquit Galenus) ab Indicatione, quæ ab Affectu, cui mederi paramus, accipitur; æstimare verò, ac discernere (scilicet perpetuò oportet) an causa, quæ affectum excitavit, jam desierit, an nunc quoq; ipsum tum augeat, tum faciat.

THES. XXIV.

Jam demonstret, quæso, Sempronius, suam Methodum, ostendat suam Indicationem ab Indicante desumptam; proferat quoddam Indicans, à quo suum Singulare indicatum fuerit; Si enim Indicationem, ex Galeni præcepto, & ipsius Rationis, & Experientiæ dictamine, ab Affectu, vel Morbo, ipsiusque Causâ accipere oportet, Singulare hocce, aut febrem ipsam, aut ejus causam respexisse, necesse est; Qvod
B
autem

autem neque hanc, neque illam respexerit, manifestum est; non *Febrem*, quia *Febris*, ut *Febris*, quippe cuius natura, & formalis ratio, in Caloris Nativi à statu naturali recessu, & incendio, consistit, *Alterantia contraria*, hoc est, *Refrigerantia* indicat; non *Causam febris*, humorem scilicet biliosum peccantem, quia hæc ipsa, remotionem sui per manifestas *evacuationes*, indicat; Neuter autem horum effectuum de *Singulari* isto *Antifebrili* prædicari potest, nec debet; alias enim *Singulare* non esset; ita ut fateri tandem cogatur *Sempronius*, aut ipsum *Singulare* ipsius, vel alterando, vel causam removendo, febrem extinxisse; aut alia insuper, pro febris curatione, fuisse adhibita convenientia Remedia; aut, ut *Galenus* se submittat sententiæ, opus habet; Si fatetur prius, propriam fatetur turpitudinem; dum, quod Medicis omnibus notum, & commune est, ille pro *Singulari* jactitat; quod candido *Titio*, in curatione febricitantis Petri *Appropriatum* fuit *Alterans*, vel *electivè Purgans*, *Diaphoreticum*, *Diureticum*, *Confortans*, &c. id glorioso militi statim debet esse *Singulare*, cum tamen *Singularis*, vel singularitatis vix hilum in se contineat, atque adeo plus sit in titulo, & inscriptione, quam in chartâ, vel pyxide; Si fateatur *posterius*, fraudulenter egit, & procul dubio plus sibi, suoque *Singulari* tribuit, quam tribuere, vel deberet, vel fas esset; Si enim alia, & præsertim, quæ febrem, febrisque causam respexerunt, adhibuit Remedia, quò, quæso, rationis oculo videre, & cognoscere potuit, an ex *Singularis* ita dicti, an verò reliquorum potius convenientium usu, Dominus Johannes restitutus fuerit; Si verò neutrum fateatur, ex *Galenus* sententiâ, *Temerarius* est, utpote, qui nullâ utitur *Methodo*, sed soli vel fortunæ, vel temeritati sese, suosque ægrotantes, committit, & qui nec sibi ipsi, nec aliis, rationem Singularitatis sui *Singularis Antifebrilis* reddere potest; *Methodo* enim *invenire* (curationem) inquit *Med.* *Galenus*, opponitur ei, quod est, fortuito, temereque invenire.

THES. XXV.

Sed ad Rhombum redire, ac perpendere tandem, oportet, quænam *Singularium* ita dictorum *Vera* ac genuina *Natura* sit; quæstionem autem, *An sit*, ne id, quod hactenus tot *Excellentissimorum Virorum* fide, & experientiâ comprobatum esse, constat, in dubium (quod absit!) vocasse videar, missam planè facio; atque adeo, de vera *Singularium* ita dictorum existentia, ipse nec dubito, nec dubitare debeo,

beo, multò minus *Verorum Singularium Autoribus*, & *Inventoribus*, quicquam five honoris, five famæ, & laudis, detrahere, sed potius labores, & merita ipsorum hâc in parte, honorifice deprecare, ac commendare gestio.

THES. XXVI.

Genuinam verò *Singularitatis* istius naturam, ac quidditatem penitiùs investigans, ea, quæ hâc de re supra pro fundamento habui, hîc ut repetantur, necesse esse, existimo; scilicet quodlibet *Singulare*, vel *Morbum*, vel *Morbi Causam*, vel *Symptoma*, absolute respicere; cum ipsius *Rationis* consensu, & *Galen*i *Autoritate*, præter hæc tria nihil aliud sit (in humano Corpore) quod curetur (vel curari possit ac dicatur) *Medicis*.

Thesi 9.

libr. 1. Meth. Med.

THES. XXVII.

Quò positò, vera *Singularium* *Requisita* ad invenire, dextrèque explicare, instituti equidem fert ratio, sed hoc opus hîc labor est! Ut tamen expediam, quod expediendum est, sic tandem de *Veris Singularibus* sentiendum esse, existimo; nimirum *Veri*, *sinceri*, *genuini* & *infucati* *Singularis* qualitates, conditiones, & *Requisita* hæc sunt: 1. ut *Autor*, & *Inventor* *Ipsius* sit *eruditus*, & *Rationalis Medicus*, ac *exercitatus Practicus*. 2. Ut *soli Autori* *singulare*, & *notum* sit. 3. Ut *singularem*, *sibi*q; *propriam*, ac *nullis aliis Medicamentis communem* *passim*, *agendi vim*, ac *rationem* obtineat. 4. Ut *Singularium* quodlibet, *Lege Methodi*, *suum agnoscat Indicans*. 5. Ut *dextrè*, *legitimè*, & *convenienter* *adhibeatur*, & 6. Ut *usum* *Ipsius singularis* non minus, ac *certus* *sequatur Effectus*, & *Operatio*.

THES. XXVIII.

Omnino autem oportet, ut *Autor*, & *Inventor* cujuslibet *veri Singularis*, *Eruditus*, & *Rationalis Medicus*, ac *exercitatus Practicus* sit; *Medicamenta* enim *Medicorum* sunt *Instrumenta*, & legitime non inveniuntur, nisi ab *Artifice Medico*: Hæc autem *Tria* *Veri*, ac *Boni Medici* *nota*, ac *Characteres* sunt; *Eruditio* scilicet, quæ *Rerum Medicinalium* præsupponit *notitiam*; *Ratio*, quæ *legitimam* docet *Medendi viam*, ac *Methodum*; & *Praxis*, quæ *rationi* *adjungit experientiam*.

THES. XXIX.

Sic *Singulare* soli etiam *Autori* & *Inventori* *Ipsius* *singulare*, ac *notum*

notum sit, necesse est, aliàs esset contra naturam *Singularis*; quod enim pluribus notum, ac commune est, qua ratione Uni soli potest esse, vel dici, *Singulare*?

THESIS. XXX.

Singularem porrò, sibi que propriam, ac nullis aliis Medicamentis communem passim agendi Virm, ac Rationem *Singulare* oportet, ut habeat; Si enim eodem planè modò, eademque ratione, vel alterat, vel catholicè evacuat, vel electivè purgat, vel vomitum excitat &c. vel viscera, & Partes Nobiles specificè confortat, ac vel Appropriatum, & specificum est Cordiale, Cephalicum, Epaticum, Splenicum, Stomachale, qua Centum alia suam operationem in Corpore humano habere, per tot secula, à sexcentis Medicorum millibus observata fuerunt, & approbata; qua, quæso, ratione jamdum uni soli *Singulare* esse poterit?

THESIS. XXXI.

Præterea quoque opus est, ut *Singularium* quodlibet, lege *Methodi*, sicut agnoscat *Indicans*, cum enim *omnis Medendi Methodus per Indicationem fieri*, dicatur, qualibet autem *Indicatio* à suo *Indicante* proveniat, nullum proinde *Singulare*, Rationaliter quidem medendo, exhiberi poterit, nisi quod à suo *Indicante* indicatum fuerit. Si enim nullum adsit *Indicans*, seu *agens aliquod in corpore humano præsens*, quod *Singulare*, ut *Singulare*, *Auxilii loco* indicet, & *indicatum Singulare ad sese dirigendum esse monstret*, cui, quæso, fini, rationaliter adhiberentur *Singularia*? Non video.

THESIS. XXXII.

Quod si autem à suo *Indicante* indicatum jam sit *Singulare*, oportet ulterius, ut & ipsum dextrè legitime, & convenienter usurpetur, & exhibeatur; hoc est, si universalia, & quæ, lege *Methodi*, præmittenda erant, præmissa fuerint, exhibere tandem *Singulare* opportunum est.

THESIS. XXXIII.

Atque ita! ex quadam quasi necessitate requiri tandem videtur, ut cujuslibet *Singularis* usum singularis etiam sequatur effectus, & operatio; Singularitas enim, quæ de *Singularibus* dictis prædicatur, non *Autorem tantum*, cui singularia, & familiaria sunt, sed *effectus, & operationis imprimis singularitatem*, respiciat, atque includat, necesse est;

est; Nisi unum ex occulta quadam vi, ac singulari proprietate singulis *Singularibus* singularis inesset agendi potentia, quæ, post legitimum, & convenientem ipsius usum, singularem etiam planè, sibi que proprium, ac nullis aliis Medicamentis familiarem, vel communem Effectum, & operationem certò, ac manifestè producat, non video sanè, in quo differant, vel differre possint *Singularia*, ab *Appropriatis* vulgaribus, & Medicamentis aliis, utpote quorum usum, idem sequitur effectus, eademque operatio.

THES. XXXIV.

Sed dum hæc dixisse satago, pertransennam quasi non paucas video objectiones, & instantias, quibus ea, quæ de *Singularium* dictorum *Requisitis* hætenus relata sunt, impugnandi non parùm, nisi planè subvertendi, animus est: Sic enim *magnum existimatur postulatum* nullum esse, nec dici debere *Singulare*, nisi cujus *Autor* sit aliquis *Medicus*; quasi verò [ut audio] soli tantùm *Medico* Medicamenta, & *Singularia* invenire competat, & concessum sit; Cum tamen *Experientia*, & quotidianus rerum usus testentur, esse inter *Magnates* pariter, ac cujuslibet conditionis alios, non paucos, qui & ipsi, etiam si *Medici ex professo* non sint, egregia nihilominus *Experimenta* ac *Singularia*, & habeant, & præparare, ac componere sciant, ac soleant; Item præparationes, labores, & processus (in Chymicis præsertim) esse diversos; & quamvis hoc, vel illud Medicamentum, notum alias, omnibusque cognitum sit, singulari tamen artificio, singularique processu, & labore ab hoc, vel illo, sive ratione Coloris, Saporis, Odoris, Jucundius; Sive, dosi ratione, Gratius; sive, ratione Operationis, reddi Tutius; Sic haberi, ajunt, *Singularia*, quæ, cum alia adhibita Medicamenta quam plurima, nihil planè in hujus, vel illius Morbi Curatione, efficere potuerunt, ægrotantes vel sola felicissimè restituisse, dicuntur; sic, dicunt occasione istorum *Singularium*, *Chymia* magis, magisque excolitur; multisque proinde, Naturæ Arcana, & penetralia intimius scrutandi, ansa suppeditatur, & occasio; sic, ferunt, magnam esse simplicitatē, rationē singularitatis à *Singularium* Inventoribus quærere, quia hoc, vel illud *Singulare*, huic, vel illi p. n. affectui remedium dicatur; cum propterea sit, & dicatur *Singulare*, quod Virtus, & Operatio ipsius nemini, quàm soli *Autori* nota,

ta, & singularis esse debeat; sic, perhibent, non esse necessarium, ut *Singulare* indicetur ab *Indicante generali*; Et tandem somniant, quosdam propterea tantum finistrè sentire de *Arcanis*, & *Singularibus*, quod vel *Chymiam* ipsi non exercent, vel eandem planè non intelligant; & quæ sunt alia.

THESIS. XXXV.

Verum enim verò, etsi toti constet Orbi, esse inter *Magnates* pariter, ac cujuslibet conditionis alios, non paucos, qui & ipsi, etiam *ex professò Medici* non sint, egregia nihilominus Experimenta, ac *Singularia*, & habeant, & præparare, ac componere, & sciant, & soleant; Certò tamen est certius, illa Experimenta, & *Singularia* omnia, cujuscunque etiam sint formæ, virtutis, & operationis, *Medicos* tanquam *primos Autores* solos, ac semper agnoscere, & *originaliter* provenire à *Medicis*, ac per tertium, vel quartum, vel plures, aliis esse communicata; Constat enim, & palam est omnibus, ipsis etiam *Magnatum* Laboratoriis, vel *Medicos* præesse, ut laborum *Directores*, vel ipsis *Laborantes* dictos substitui: Hos autè, utpote, qui *Medicorum* ministri sunt, quicquid boni, quicquid solidi sciant, & sapidi primariò habere à *Medicis*; Et positò esse quosdà, qui, & si *Medici* non sint, vera tamen, & approbata (ab aliis puta communicata) *Singularia* habeant, legitimū tamen eorundem usum ignorant, quia *Artis* ignari sunt; & consequenter eadem facilitate, ex ignorantia, lædere, ac interficere possunt, quā, ex temeritate, juvare, ac sanare audent. Quod cum sit extrā omnem controversiam, firmissimo stare talo, existimo, *Autorem cujuslibet veri singularis, Primarium, & Verum, semper esse Medicum*; Hujus enim Professio est, scire qualitates, & Virtutes Simplicium; ex iisdem *Artis Pharmaceuticæ* ope, dispensare, & ordinare Composita; scire Morbos, eorumque Causas, & Symptomata, Scire Medendi Methodum, & in cujuslibet morbi curatione Indicantia, Coindicantia, Permittentia, prohibentia, Contraindicantia, & alia, quæ ad prudentiam Boni *Medici* spectant, diligenter prudenter ac circumspiciè attendere; unde, quā ratione quisquam alius, qui à pueris, & ex professò, hæc omnia non didicit, sed nescit planè & ignorat, *Singularia* invenire, eademque ægrotantibus salutariter exhibere, valeat, judicet quilibet, qui candidus est. Bonis interea *Medicis* circa hanc objectionem non inju-

injusta suboritur indignatio, quòd scilicet *Chymicorum* non pauci, illiteratos ut plurimum quosvis, Idiotas, rudeseque non raro Asinos, in sua passim excipiant Laboratoria, ipsisque processibus, & labores suos concredant, alios verò, & qui sunt de communi studio, vel raro, vel non, nisi ad vulgarium præparationem admittant; hinc enim pleræque illa lacrymæ! hinc fit, ut incomitum illud vulgus, utpote, penes quod nulla planè est alia rerum Medicinalium cognitio, quicquid præparari videat, *Secretum* esse, *Singulare* esse, credat; ipsumque tandem hæc, quâ ducitur, phantasiâ, persuasum, abeat; *Singularia* jactitet; *Magnates*, & *Curiosos* quosvis adeat; miracula prætendat, & nescio quid; quæris successum rei, & eventum? Fallunt, decipiunt, defraudant ut plurimum, egregiè, speciosè, & singulariter; hoc tamen, ut verum & approbatum *Singulare* semper habent, & possident, quòd, qui decepti ab aliis sunt, taceant, nil dicant aliis, sed, quod decepti sint, sibi tantum, & pro *Singulari*, ac in secreto habeant; sed habeant!

THES. XXXVI.

Medicamentorum porro præparationes, Labores, & processus esse diversos, non nego; quod autem sola præparationis diversitas, & singularitas *Singulare* statim dictum, & novum Medicamentum efficiat, omninò nego; cum enim *facilius* sit, *inventum corrigere*, quàm *novum invenire*, non video, cur sola præparationis correctio debeat statim esse, & dici novi medicamenti, vel *Singularis* inventio; Præsertim, cum tantum absit, ut hæc sola *Singularis* distincturam exhaustiat, ut potius omnibus in universum *Medicis* communis esse soleat; quot enim capita, tot sensus; & qui nostris, quæ hæcce Seculi felicitate prostant, Officinalibus, vel addere quicquam, vel detrabere, vel quovis modo, si ex arrogantia stimulo velit, corrigere eadem nesciat, quid tandem ille sciat, quid sapiat, ipse nescio; hoc verò scio, & fateor, quod si *Eruditus Medicus*, & *Exercitatus Practicus*, ex multo rerum usu, quicquam habeat, quod circa hoc vel illud Officinale, ipsiusque vel ingredientia, vel præparandi Rationem, vel commodum utendi modum, in salutem egrotantis proximi, notari possit, dicere illud, notare, & corrigere, conscientia juxta, quàm officii ratione, teneatur.

THES. XXXVII.

Hæc autem Remedia, quæ, cum alia legitimè adhibita Medicamenta quàm plurima nihil planè, ut ajunt, in hujus, vel illius mortificatione, efficere potuerunt, ægotantes *solâ* restituisse dicuntur hæc, inquam, laudarem; hæc magni facerem; hæc pro verè *Singularibus* omninò habenda esse, censerem; nisi istud me moveret, quòd restituisse *dicantur*; quæ ex præconcepta quadam opinione, affectu & confidentia, ita esse creduntur, vera tamen non sint, difficile proinde hoc ipsum quoque æstimarem Judicium; hoc enim illorum, quæ *Singularia* crepant, ut plurimum est PROPRIUM, ut, cum succedantur opinione, quemcunque bonum Curationis eventum, & effectum, solis suis adscribant Singularibus; de quo tamen sub judicis est.

THES. XXXVIII.

Præterea quòd occasione *Singularium* dictorum *Chymia* magis magisque excolatur, multisque proinde Naturæ Arcana, & Penetrabilia intimius scrutandi, ansa suppeditetur, id, cæteris quidem paribus, facile largior; Fuerunt enim, & jam dum sunt plurimi, qui, cum persuasum sibi haberent, Hunc, vel Illum, occasione hujus, vel illius *Singularis* dicti, in summam, apud ægotantes, & quosvis Alios, venisse gratiam, & existimationem, & ipsi strenuam *Chymia* navare operam cœperunt, & eo quidem successu, ut, non sine insigni *Reipublicæ Medicæ* incremento juxta, quàm publica multorum ægotantium salutis tot Medicamenta componendi, composita corrigendi, augendi, meliorandi, & rectificandi vias, totque egregios Processus ingeniosè sat invenirent, studiosamque juventutem in Academiis hac in Artis parte informare, atque adeò Bono Publico optimè consulere allaborarent; Ast verò, quot pessimos *Abusus* hujus Artis interea produxerint abortus, experimur quotidie; vix enim vigesimum invenies, qui talentum suum *Bono* mancipet *Publico*; Omnes quidem, sub specioso *Chymia* excolendæ prætextu, *Publico* aures pollicentur Montes, pauci verò *Singularis* quicquam præstant, & si quid præstant, sibi servant, adeoque non *Publicum*, sed *Privatum* quærunt commodum. Omnes *Chymiam* de prædicant, & *Chymicos* se esse jactitant, cum tamen *Nobilissimam Artem*, laboribus suis potius prostituunt, ac vix un-

bram

bram, nec dicam Characterem (quos Excellentissimus Rolsinckius re- *libr. 1. Chym.*
 censet) vel notam Veri Chymici præ se ferre videntur; Et hinc eve- *in Art. form.*
 nit, ut sordidus tandem Agyrta, & Circumforaneus quilibet, Chymi- *redact. cap.*
 am eructet, & Singularia exclamitet; ô mores! ô tempora! *3. 6. 4.*

THES. XXXIX.

Magnam autem esse simplicitatem, Rationem singularitatis
 quærere, quâ hoc, vel illud *Singulare*, huic, vel illi p. n. affectui re-
 mederi dicitur, vix concedet, cui stat Ratio; *Rationalis* enim *Medicus*,
 quicquid agit, ejusdem rationem reddere tenetur, si fundamentalis
 est; & posito, esse *Medicum*, qui uno, vel altero *Singulari* hunc, vel il-
 lum curavit affectum, nihilominus tamen operationis rationem red-
 dere potest, absque omni præjudicio, etiam si *Singulare* ipsum nec di-
 cat, nec revelet; ita, ut, quibus, rationem Singularitatis quærere, sit
simplicitas, illorum *Singularia* videantur esse figmentum, & *Vanitas*.

THES. XL.

Omninò verò necessarium est, ut *Singulare* quodlibet à suo *In-*
dicante speciali indicetur; scilicet, si illud a *Rationali*, & *Methodico*
 adhibeatur *Medico*; *Methodicus* enim *Medicus*, in Morborum Cura-
 tione, non acquiescit in *Indicantis generalis* apprehensione, sed, ex
Medendi Methodo, *specialia* insuper quærit *Indicantia*, utpote, quæ Cu-
 rationem propius respiciunt, & ipsa Auxilia, & Curandi Media, digi-
 to quasi monstrant, ac indicant; quorum materiam tandem facile
 invenire poterit, qui peritus in *Arte*, & exercitatus est.

THES. XLI.

Et tandem merum esse somnium, fateor, dum dicunt, eos tan-
 tum finitè sentire de Arcanis, & *Singularibus*, qui vel *Chymiam* ipsi
 non exerceant, vel Eandem planè non intelligant; Sicut enim alias,
 ab *Esse*, ad *Posse*, non datur *consequentia*; Sic falsissimum, & absurdum
 planè est, dicere: Hic *Chymiam* Ipse non exercet, E. *Chymiam* non in-
 telligit; Sic quale absurdum esset, si dicerem: Hic *Medicus* cadave-
 ra Ipse non dissecat, E. *Anatomiam* ignorat; Hic venam Ipse non secat;
 luxata Ipse non reponit ossa; vulnera, & ulcera Ipse non tractat &c. E.
Chirurgiam non intelligit; & sic deinceps; Cum enim, ex tripode
 C dixisse

dixisse *Hippocratem*, visum fuerit *Veteribus*, quod *vita brevis*, *Ars* verò *longa* sit, prudenti juxta consilio, quam summo *Posteritatis* comodo, *Artem Medicam* in *Partes Principes*, & *Ministras* dictas, dividere, decretum, & statutum est; Eum quidem in finem, ut, cum *vita nostræ Brevitas*, in comparatione, & proportionem ad *Artis longitudinem*, & ingentem *Rerum* discendarum, ac tractandarum *copiam*, vix sufficere valeat, sint, qui ex professo, quod dicitur, *Principes Artis* *Partes* tractare, suscipiant, & *Medici* dicantur; & sint, qui *Ministras* & ipsi ex professo exerceant, & expediant, & *Pharmacopœi* ac *Chyrurgi* vocentur; Ità, ut *utriq; unam*, quasi constituent *Oeconomiam Medicam*; illi quidem, qui *Directorium* habeant in omnibus, hi verò, qui obsequiosum Illis præstent *Ministerium*; quòd si jam utriq; & *Dominus*, & *Ministri* suo fungantur officio, benè agitur, & ægrotantium saluti salutariter prospicitur; Sin secus, malè; Præsertim, si invertatur ordo, & qui debuisset esse *Dominus*, incipit esse *Minister*; & vice versâ.

Porro autem absurditas dicta, vel ex eo etiam probari videtur, quod propositio hæc: *Chymicus Singularia* præparat, non sit convertible; ità ut dicere possem: *Chymicus* præparat *Singularia*; Ergo, qui *Singularia* præparat, est *Chymicus*; alias enim *Circumforaneus* quilibet, *Singularia* jactitans, esset *Chymicus*; quod tamen de Tanta tamq;ve *Excellenti Arte*, utpote *quæ cum ad Utilitatem, tum etiam ad splendorem, ac Amplitudinem Reipublicæ Medicæ multum conferre videtur*, dicere, *Religio sit!* Absurdè ergò sentiunt, qui ita statuunt: falsò sibi persuadentes, neminem esse, vel posse esse *Bonum Medicum*, nisi, qui Ipse *Chymiam* ex professò exerceat; Cum enim *Chymiam* utpote, *quæ est Pars Pharmaceuticæ, & à quâ in hunc usq; diem separari meritò nec potest, nec debet, exercere, non essentialiter pertineat ad Medicum, ut Medicum, sed penes cujusvis sit arbitrium; sufficit omninò, tantum scire in Chymicis, quantum vel ad modernas Galeni Chymicas dictas Morborum Curationes necessariò requiritur, vel ut Rolfinck. l.1. ex usu quæ videntur; methodicè adhiberi, quæ minus, cum judicio o Chym.in Ar. mitti, queant; ita, ut prædominium semper habeat Legitima Medente form. re- di Methodus; præstat enim Methodo quidvis, quam solâ Experiendact. cap.1. facere; & hîc succurrit mihi, quod in albo Candidati cujusdam Me Gal.3. M.M. dicinæ legi dictærum, scilicet;*

*Methodus, sine Chymia, facit Medicum;
Chymia, sine Methodo, Carnificem.*

THES. XLII.

Jam si ad Lydium eorum, quæ dicta sunt, revocari lapidem, exactèque examinari deberent Modernorum, *Medicinam* passim facientium, *Singularia*, non defuisse hætenus, nec adhuc deesse *Viros* doctos, & Excellentes, qui, magno rerum usu, & longâ experientiâ ducti, certa invenerunt *Singularia*, certò quidem constabit certius; Ast eheu! quot econtrà dubia, quot difficultates, absurda, mendacia, fraudes, inconvenientiæ, Calumniæ, Lites, Rixæ, & nescio, quot maiorum myriades, sub specioso *Singularium* dictorum prætextu, nostram hinc perniciosè infecerint *Artem*, est sanè, quod non sine justo dolore, omnes Boni, Conscientiosi, & Rationales doleant *Medici*; Sicut enim legitimus, ac conveniens Verorum *Singularium Usus* omnem laudis, honoris, & gloriæ meretur titulum, sic eorundem *Abusus*, & lusus, tantâ hætenus sacram *Artem* nostram affecit injuriâ, ut, quâ ratione in pristinum, & integrum, restitui *Ars* valeat, summè videatur difficilè.

THES. XLIII.

Ne verò, dum scapham scapham dicere fas est, festucam aliorum vidisse, trabem verò Eorum, qui meæ professionis sunt, vix observasse, nedum persensisse videar, fateri omninò cogor, cæco planè *Singularium* amore captos, raptosque hætenus, non minus etiam *Medicos*, & quod magis est, *Viros* alios Excellentes, eoque devenisse, ut in Morborum curatione, *Singularibus* suis ita dictis, nisi omnem, præcipuam tamen laudem impertirent, & fiduciam; quò verò id factum non rarò fuerit, & jamdum fiat, eventu, dies testatur, & Experientia.

THES. XLIV.

Hæc etenim ratione, & dum spes omnis, & confidentia solis tribuitur *Singularibus*, *Rationalis* ut plurimum negligitur *Methodus*; quâ neglectâ, & seposita, non curatur amplius, qualisnam certò, qui curatur, p.n. affectus sit? An per essentiam, an per consensum affligat? An unus, vel plures, & complicati sint? An à causa calida, an frigida, proveniat? An marem corripit, vel Fœminam? An senem,

vel puerum? An Plethoricum, vel Cacochymum? An Biliosum, vel Pituitosum, vel Melancholicum? Et si quæ aliæ notabiles, ac necessariae occurrant circumstantiæ; Ut mirum proinde non sit, quòd Morbi alias Breves, & facile curabiles, nec ipsi tollantur, nec remouentur eorum causæ, sed radices agant, & vel degenerent in alios, priori peiores, vel fiant Chronici, ac diuturni; ipsique tandem ægrotantes, contra Canonem, & præter necessitatem, moriantur, ac pereant;

Hipp. libr. 6. nisi vel Audacem fortuna iuvet, vel, post Deum, Natura, morborum

Epidem. Medicatrix, errorem ipsa corrigat. Hinc contingere experimur, quòd, si in Morbis gravioribus, ac periculosis, instantis vitæ periculum, vel mortis tandem causa, à Cognatis & Adstantibus quærat, Internarum partium, Epatis imprimis, Mesenterii &c. Inflammationem, Gangrænam, & nescio, quam Viscerum corruptionem, speciosè effingere, ac mentiri, & inevitabilem adeò mortis quasi necessitatem, credulis præcipuè mulierculis, Patheticè satis persuadere sciant, ac fatagant; Cum tamen nullius planè, vel inflammationis, vel Gangrænæ, vel Corruptionis, per totum morbi decursum, unquam appa-uerit vel signum, vel vestigium; Multò minus ex Receptis in Pharmacopolia missis, quicquam doceri, & remonstrari possit, quod ad profliganda ista mala, præscriptum, & ordinatum sit. Et hi ipsi sunt, qui Morbos, & pericula fingere, non dubitant; Unde Credulum Vul-

Rayn. Mind gus, plerumq; autem Divites, inani metu percellere nonnunquam ag-

Thren. Med. gressi sunt, Apoplexias, Epilepsias, Hydopes, Gangrenas, Viscerum Cor-

cap. 9. ruptiones, aliosq; Gravissimos, Morbos, hominibus imminere, mendaci-

planè linguâ præfagientes, à quibus, pro præservationis Consilio, magna

præmia expectant; Cum enim ab imminentibus Periculis sibi metuerent

ægrotantes, Auxilium ab his petendum, aut magno pretio coëmendum,

rati sunt, quos pro Prophetis, ac futurorum Periculorum nunciis susce-

xerant; Unde, si quando vel leve sabulum in Urina conspectum fuit,

mox lapidem, novaculis exscindendum, subesse comrainati sunt &c.

THES. XLV.

Sic Consultationes & Concurrentiæ, in Casu difficili, & morbis gravioribus, & summè periculosis, cum Medicis Aliis, vel non, vel raro admodum, & non, nisi coactè habentur, & admittuntur; Quia unusquisque sua adhibere gestit Singularia, jam verò, cum alter alte-

rius *Singularium* Naturam, & vires nesciat, (nescit autem omninò, quia *Singularia* sunt) vel alter sua recommendare *Singularia*; alter verò Medicamenta convenientia ex *Officinis Pharmaceuticis* ordinare, nititur, animorum subinde dissensus prognascitur, & æmulatio; Quâ verò ratione, quâ conscientia, & quò tandem successu, & eventu, talis habeatur *Concurrentia*, penes *Rationales* quosvis candidum esto *judicium*.

THES. XLVI.

Et sanè, ut fatear, quod verum est, non video, quomodo *Rationalis Medicus*, ad *Concurrentiam* cum alio vocatus, prioris *Singularia* approbare, inq̃ usum eorundem consentire possit, nisi *Empiricum* agere, ac eventum *Curationis fortune*, vel *temeritati* committere velit; Si enim media ad *Curationem* necessaria ignoret, quomodo de ejusdem successu, & eventu certus esse poterit?

THES. XLVII.

Nec levis subindè prognascitur *Arrogantia*; dum enim vident, & experiuntur, hoc vel illud *Singulare* bono interdum adhiberi successu, eò tandem deveniunt, ut morbos omnes, solis, & paucis aliquot *Singularibus* curari posse existiment; adeoq̃ salutem omnem ipsis solis attribuant, cum tamen, si quærantur, ipsi rationem reddere nesciant, an ex *Artis* præscripto, an verò *fortunâ*, vel casu, vel ex *Accidenti* processerit *Curatio*.

THES. XLVIII.

Arrogantia porro hæce parit *Contemptum*, pessimæ matris filium; qui alios pariter invadit, & exercet *Medicos*, ac ipsos *Pharmacopæos* excruciat; *Illos*, dum misello vulgo, ac credulo nimis popello, speciosè satis persuadere fatagunt, quàm citò, quàm tutò, quàmque jucundè suis *Singularibus* remederì morbis possint, quos *Medici* alii, *Singularibus* non instructi, vel vix, vel non, nisi longo tempore, positionibus longis, multoq̃ve medicamentorum, ad nauseam usque exhibitorum, usu, curare valeant. *Hos* verò, dum eorundem, vel ignorantiam in rebus Pharmaceuticis, vel in præparandis Medicamentis negligentiam, vel in taxando avaritiam, vel in vendendo, ac substituendo fraudes, & malitiam, & nescio, quot defectus allegare, & accusare laborant.

THES. XLIX.

Ne verò, si plura dicerem, *veritas odium pariat*, digito com-
 pesco labellum; hoc tantum superaddens, quod & summa Rei
 esse, & impium pariter, ac invidum mihi semper visum fuit, scili-
 cet, quod paucissimi hactenus de suis *veris*, & *Approbatis Singula-*
ribus dictis posteritati quicquam revelaverint, vel reliquerint; cum
 tamen secum reputasse debuissent, se non sibi, sed *Reipublicæ* natos
 esse; atque adeò, si quid utilis, si quid boni, commodique ad publi-
 cam *Proximi salutem* à se proficisci, ac redundare possit, id, ex quo-
 dam quasi *Naturæ debito*, exsolvi debuisse; & quamvis sciam ma-
 gnum dici postulatum, petere communicationem, descriptionem,
 Processum &c. hujus, vel illius *Singularis* dicti, utpote, quæ longo
 labore, sumtuque interdum non parvo comparata, & propterea non
 cuilibet statim propalanda, sed in secreto reservanda esse, dicuntur,
 ut & aliis subinde, in Arcana Naturæ penetralia scrutandi, surroge-
 tur occasio; Larvam tamen esse hanc excusationem, ac latitare ut-
 plurimum aliud quicquam, extra omnem videtur controversiam;
Christianam enim *Charitatem*, utpote quæ nos omnes, ut quili-
 bet, talento suo, salutem Proximi promoveat, devincire invicem fa-
 tagit planè taceo; Nec meum prorsus facio, quod *Renatus Moreau*
vers. ad C. hanc de re scripsisse legitur, dum ait: *Rutam contritam naribus, & ori-*
37. Schol. Sa- *Epilepticorum Impositam liberare egros ac etiam perfectè sanare, ob-*
lernitan. p. servat *Michaël Sanavorola*; subditque, hoc præsidium pro secreto,
 435. & *Singulari*, tenendum, quod tamen omnibus propalandum sit, ac re-
 velandum; quoniam talia subtricare, videtur peccatum in Spiritum
Sanctum. Ex quibus verbis (sunt verba Moreau) discent Chymista,
Argyræ, Circulatores, Circumforanei, Arcanorum Transscriptores,
 & quicunque, se Remedia, Arcana, Secreta, & Singularia habere, profi-
 tebuntur, pessimè agere; non solum, quia, ut plurimum falsa pro veris,
 inepta pro sinceris, vana pro certis præstatis, venditant; Sed etiam
 quia, quæcumque tandem illa sint, subtracent, & agris, & Medicis Dog-
 maticis, qui pro suspectis semper remedia illa ἀλογα, aut ab ἀλόγοις
 hominibus suppeditata, habent.

Sed hoc tantum cujuslibet Speculationi, Rationi, & Candori
 perpendendum remitto, nimirum, cum constet Omnes omnino ho-
 mi-

mines, & præsertim, qvi literis adducti sunt, qviqueqvid boni agant, qviqueqvid intendant, & qviqueqvid ingeniorum acumine inveniant, vel invenire studeant, id omne, *Fama*, ac nunquam interitura *Nominis* sui gloria gratia; vel sacrâ *Auri* ac *divitiarum* fame, agere; Quæ tandem causa sit, Cur Tot, etiam Clarissimi Viri, è viventium numero, ad plures abeant, qvi tamen, de suis *Singularibus* dictis, ne tantillum qvidem *Posteritati* relinqvant? Tantùm autem abest, ut ex fordida quadam Avaritia, quæ *Empiricæ* *Sectæ* cognata quædam, ac *Nutrix* est à *Bonis Medicis* id fieri, concedam, ut potius vitium hoc alienum planè ab iisdem esse, atqve adeò de *Impostoribus* tantùm dici existimem, quod dicitur: *Reperti sunt Complures, qvi Experientias aliquas, nullis forsan Rationibus innixas, nacti, easdem studiosè custodire, celare, velare, ac abscondere studuerunt; non, quò Artihonorem, sed quò sibi lucellum aliquod majus compararent, ut, quod sine speciali eorum consensu, voluntate, ac deceptorie liberalitatis munificentia, Remedium obtineri non posse putabant, egri, præmiis ab ipsis Celatoribus, tanquam ex Captivitate, redimerent.*

Raymund.
Mind. Thr.
Med. c. 9.

Non eqvidem latet, quod vulgò, & verè qvidem dicitur, *Neminem esse obligatum, Arcana, & Singularia sua in Vulgus propalare; Item, Medicamenta Prostitutione vilescere, &c.* Respondetur enim, aliud esse, propalare *Singularia in Vulgus*, hoc est, illiteratis qvibusvis, & à Medicina alienis, Mulierculis puta, Idiotis &c. eadem manifestare, ac concedere; Aliud verò, *Orbi Literato, Medicorumq; familie* communicare Eadem; Aliud item esse, quod *de Jure*; aliud autem, quod *ex Christianæ Charitatis debito* fieri dicitur; Unde Medicamenta, etiam singularissima, quæ in *Ægrotantium Salutem, & Artis Incrementum*, aliis communicantur *Medicis*, nec prostitui, nec prostitutione vilescere, dici possunt; nisi qvi dicat, (quamvis absurdè dicat) *Artem* nostram, & olim, & à primis ipsius incunabulis, egregiè fuisse prostitutam, & jamdum prostitui enormiter; Quàm ingenuè enim, & quàm candidè *Primi Artis Parentes*, qviqueqvid in imis scientiæ, & *Experientiæ Medicæ* habuerunt penetralibus, *Posteritati* communicaverint, negare non potest, nisi qvi *Artem* negare ipsam audeat malevolè; Et quantà quæso ipsorum Laude, (ut qviqueqvam tantum de nostro hocce dicam *Seculo*) quandoq; *Poste-*

Posteritatis Commodo, sua nobis Inventa, verè Singularia, commu-
Caspar Afell. nicarunt haftenus Anatomici, Venas puta Lacteas Mesaraicas; Du-
Job. Georg. etum Pancreaticum; Glandulosa Chyli Receptacula; Vasa Lacte-
Virfungus. Thoracica; Vasa Lymphatica; Ductus Salivales; Nobilem item
Johan. Eec- Sanguinis Circulationem; & Singulares circa eandem habitas, eidem
qvetus. que accommodatas Observationes; Curiosam de Ossis Cribriformi
Th. Bartho- usu speculationem, &c. Sic à Pathologicis, & Practicis Celeberri-
linus. mis, quibus Novi, vel rari quicquam observare licuit, integras ha-
Jo. Hornej. bemus Morborum Historias, Observationes Medicas, Casus Raros
Olaus Rud- Enarrationes, Epistolas Medicinales, Consilia, Consultationes, Anno-
beckius. tationes, Curationes insignes &c. ita ut Charta deficere videatur, f-
Harveus. Præclara omnium, qui hac in parte de Artis Incremento, & Bon-
Gvern. Rol- publico, optimè mereri allaborarunt, exprimere deberem nomina
finckius. Sic Exoticorum Periti suam Nobis non subticuerunt Herbam Thee,
Conr. Vict. Chinam China, Cavee, Crapp, Terram Catechu &c. Quemadmo-
Schneider. dum nec Curiosi Alii Inventa sua, quæ quovis modò ad Artis, vel
Incrementum, vel Ornamentum facere, visa sunt, occultare rati sunt;
Quæ inter insignis Modernorum Instrumentorum Anatomicorum,
Chymicorum & Chirurgicorum apparatus, de Inventorum Candore
testatur ingenuè; ita ut tantum absit, ut Ars Nostra, sincerâ Eorum,
quorum jam mentio facta est, communicatione, & propalatione
prostituta esse dici queat, ut potius insigne exinde Incrementum sum-
fisse videatur.

Jos. Quer- Soli verò *Singularium Inventores* plerique *Sua* unâ secum se-
cetanus. peliri malunt, quàm ut Eorum hæres fiat Posteritas; Quamvis enim
Osw. Crol- hocce nostro Seculo non defuerint Viri Excellentissimi, quorum in-
lius; genuus in Bonum Publicum Candor tantus fuit, ut ea, in quibus vel
Dan. Senn. novi, vel Singularis, & Arcani quicquam, longâ experienciâ depre-
Hadrianus henderunt, non sibi servarent, sed in publicam Omnium Ægrotan-
à Mynsicht. tium Salutem, & nunquam intermorituram Eorum memoriam, Lite-
Jo. Hartm. ris consignarent, ac usui facerent publico; Plurimi tamen & præler-
AngelgSala. tim, qui suis Singularibus nimium quantum fidunt, iisdemq; omne
Gv. Rolfinc. Curationis punctum præ aliis soli absolvere gestiunt, Experimenta
Jo. Schröd. sua planè subticent, adeoq; nec sibi de honesta Nominis existimatio-
Franc. Joël. ne, nec Arti de Incremento, nec Proximo de emolumento, prospice-
Jo. Zwelfe- re laborant,
rus. &c. &c.

THES. I.

Aliud ergò quicquam latitet, necesse est; quod ipsum, vel Invidiam quandam, vel quandam pudorem esse, existimo; si ex invidiâ subticentur *Singularia*, sit istud; vel respectu *Ægrotantis proximi*, vel *Curantis Alterius Medici*; si respectu illius; impium planè, inhumanum, & *Christiano Medico* Indignum est, subticere, ac sibi servare ea, quæ, si vera sunt, Sanitati, Vitæ, & Summo adeò proximi Bono, prospicere possent; Idem enim si superiorum Seculorum fecissent *Medici*, nec aliter *Rei Medicorum* consulissent *Publicæ*, per *Apollinem Medicum*, & *Æsculapium jurarem*, nec eos, qui *Singularis* quicquam subticent, tantum scire, & habere, undè, & ex quo sua *Singularia* dicta conficere valerent. Si verò respectu *hujus* id fiat, ab Eruditis, Dogmaticis, & Rationalibus *Medicis* aliis, nihil, vel parùm curari, auguror; præsertim, cum per *Dei gratiam*, & Clarissimorum, ac de *Republicâ Medicâ* & *Proximi salute* optimè meritorum *Virorum* studia, & diligentiam, tanta nobis in *Pharmacopoliis* publicis, & Privilegiatis pariter, quàm apud *Classicos* Autores quosvis suggeratur Remediorum, & Medicamentorum approbatorum copia, ut, quod, ex invidiâ paucorum, Publico denegatur, Multorum Candor, utrâque manu liberaliter satis nobis porrigat, & exhibeat. Et, si, e. g. Idem malum Hypochondriacum convenientibus, appropriatis, omnibusq; Bonis *Medicis*, notis Medicamentis, curatur in *Galliâ*, quod, per ignota *Singularia* dicta Antihypochondriaca, ab uno, vel alterò dicitur curari in *Germaniâ*; quid tum postea? Ita, ut *Varandæus*, Regius in *Academia Monspeliensi* Professor, scitè satis dixisse, legatur: *Illæ Remedia esse optima, quæ minimè sint Secreta, & Singularia, sed notissima, utpote certiori experienciâ confirmata.*

Jur. Hipp.

Præfatio l. 1
de Vulgi Er-
rorib. c. 12.

THES. II.

Cùm verò de *Christiano*, Bono, ac Conscientioso *Medico* talem præsumere, & prædicare invidiam, nefas sit; in alteram potius abire sententiam, scilicet ex modesto quodam pudore plerumque subticeri *Singularia*; ita enim hujus nostri præprimis Seculi genius fert & conditio, ut, quemadmodum in aliis plurimis, sic etiam in *Medicinâ*, Novitati plus, quàm par est, indulgere, nil novi sit; unde tan-

tus ingeniorum excitatur pruritus, tantaq; Singularitas, ut, quilibet ferè *Nova* invenire, *Singularia* tractare, *Singularia* præparare, idemq;ve, nisi omnes, plerasq; tamen Morborum Curationes, perficere gestiat; ita, ut in tantum *Singularia* dicta succrevisse videantur numerum, ut, & Tituli, ac Nomina tandem deficere, & integra Pharmacopolia iisdem, si colligantur, impleri posse, plus quam manifestum sit.

THES. LII.

Pudet autem omnino plerosq;ve, ut de suis *Singularibus* dictis quicquam certi proferant, multo minus Ingredientia, ac præparandi rationem, utendiq;ve modum, candidè manifestent; Hoc enim factò, emerito ut plurimum suffunduntur pudore, propriâq; confecturpitudine, ipsi tandem fateri coguntur, ipsorum *Singularia*, vel potius esse *Vulgaria*, vel *aliorum Inventa*, ab ipsis verò mutata quodammodo, correctâ, inq;ve *aliâ* vel *consistentiam*, vel *colorem*, vel *formam* quamcunque, esse *redactâ*; sic enim quotidiana experientia testatur, quod pleraq;ve, etiam vulgatissima non raro *Officinalia*, per se, & prout in *Dispensatoriis publicis* præscribuntur, ac à *Pharmacopæis* nostris, & ipsorum *ministris*, quotidie dispensantur, vel levissimum tantum mutata, & correctâ, sub specioso *Singularium* prætextu, & titulo, gassatim quasi circumferantur, vendantur, & exhibeantur; quod ipsum *Primerosius* innuisse creditur, dum: *Osservavi*, inquit, *multam astutem suam* (hoc est, *Singularia*, & *Secreta* dicta) *occultare*, ne, si a Medicis innotescerent, risum moverent; *Vulgaria enim Remedia*, forsitan inepta, pro magis secretis, à multis prædicantur, quæ nemini velare volunt, prudenti sanè consilio, quia nihil habent, quod *Secretum*, vel *Singulare* dici debeat.

lib. 1. de vulg.
Errorib. c. 12.

THES. LIII.

Et, quod majus est, mirari meo quidem loco satis nequeo, quod & *Novelli* quidam *Practici*, qui nudiustertius *Medicinam* facere, ac Aegrotantes visitare inceperunt, hodiè statim de suis Experimentis & *Singularibus* gloriari audeant; quæ tamen res, sicut admiratio juxta, ac risu digna est; ita altioris sanè indaginis, quamvis paulo momenti, esse, videtur; Judicii enim imbecillitatem an dicam, Arrogantiam, vel ex eò tantum apparere constat, quod, dum Ma-

rum,, ac Præceptorum suorum æmuli, fictitiis, ac opinativis suis *Singularibus* dictis, tales sæpè imponant *Titulos* ac *Nomina*, quæ risu, & cachinno digna sunt, rem ipsam, virtutem scilicet sui *Singularis*, & operandi rationem, vix ipsi intelligere videantur; Sic E.g. inter alia (integros enim possem, nisi partim honoris ergò, partim risus compescendi gratiâ abstinere, allegare Catalogos) dicta *Singularia*, datur *Pulvis in Acutis*, *Pulvis in Peracutis*; sed, quæ? qualis? quanta? Ergone *Omnes Morbi Acuti*, & *Peracuti*, unius, ejusdemque erunt generis? Non est; cum enim dentur, qui sunt à *Causâ frigidâ*, ut Apoplexia, Catarrhus suffocativus, Lethargus &c. in Senibus; cum dentur, qui sunt à *Causâ calidâ*; & totius dicti *Substantiæ*; ut, Febres ardentes; Malignæ, cum, & sine Petechiis &c. Cum dentur, quorum natura in *inflammatione* consistit, ut: Phrenitis, Peripneumonia, Pleuritis &c. quâ, quæso, Methodò, indiscriminatim exhibebitur, quâ ratione in morbis, à Causis contrariis productis, & quomodo Contrariis Indicationibus, unicus æquè satisfaciet *Pulvis in Acutis, & Peracutis*? Non video.

THES. LIV.

Et hac occasione, & ex tanto rerum abusu, evenit tandem, ut, quibus nulla unquam facta, nec concessa est, *Medicinam* faciendi potestas, & licentia, indifferenter, impune, & non sine summâ sacræ *Artis* ignominia, multorumque ægrotantium damno, & interitu, Medicos agant, *Medicinam*que faciant; Ita enim *Pharmacopœi* plerique, *Barbitonsores*, *Balneatores*, ac *Dentifrangibili*, non pauci; *Pastores Pagani*, *Agyrthæ*, *Circumforanei*que, quilibet, *Artem* exercent *Medicam*, *Singularia* effingunt, & jactitant, insignesque *Artis* nostræ Doctoribus excitant molestias; Idem passim facere audent, qui per aliquod temporis intervallulum *Chymicorum* Laboratoriis inhæserunt; hi enim statim, atque vel ignis tantum gradus moderari, vel unum, alterumque processum expedire didicerunt, in mundum universum abeunt, *Chymicos* se profitentur, ac nil, nisi *Singularia*, *Secreta*, & *Arcana* olent, & sapiunt; cum tamen omnis plerumque literaturæ planè expertes sint, & curiosum non tantum Vulgi genus, sed *Magnos* interdum etiam *Medicos*, *Magnos*que alios *Singularium*, & *Arcanorum* amore raptos, egregiè ut plurimum decipere, sumtuososque pro-

processus fugâ non rarò absolvere, soleant; Nihilominus tamen si
 Raym. Mind. ventur Hi à Magnatibus Impositores, ac in Aulis, in Hominum pernicio-
 Thren. Med. em, nutriuntur; cumulantur honoribus, Præmiis, amplisque afficiuntur
 cap. 9. Stipendiis. Et quâ denique Artis injuriâ, quodvis aliud hominum
 genus, ut sunt Pictores, Pistor, Laniones, quadrati item Rustici, Op-
 liones, Carnifices, Vetula, Saga, Præcentrices, Cingari, Harioli, Cr-
 stallanantes, & nescio, quæ hominum farrago, falcem, non tamen
 minus, quàm insolenter, in nostram messem immittat, est, quod (v-
 hic etiam Loci) insigniter doleat Medicorum familia, atque ita tan-
 scitè pariter, quàm Verè cum Medicina Lugente exclamare cogatur
 Mind. Thr. Domus mea, domus Medicationis est, Vos autem fecistis eam Spelun-
 Med. cap. 8. cam Latronum; Nam & hæc male feriatorum hominum turba, illuc
 ad quod nata, & educata est, vitæ genus, petulanter deserit, ac Ar-
 Medice illotas, & pestíferas manus malitiosè admoveat, Aquas destil-
 lat, Simples, Compositas, Preciosas; Medicamenta varia præparat
 Singularia, Secreta, Arcana jactitat; agrotantes visitat; Medicamen-
 ta exhibet; curat; necat; enecat; mortificat; & hæc quidem omni
 impune, & re quasi optimè gestâ, & quasi nullus amplius super sit Ma-
 gistratus, qui tantam malitiam, fraudes, & scelera, severè vindicare
 aut velit, aut valeat; Impudicum enim hoc Hominum Genus Toti Ar-
 minderus
 ibid. multum fastidii, tædii, difficultatis, erumnae, despectus, ac odii peperit
 cum de cogendâ magis pecuniâ, quàm de mortaliû salute sollicitum, Et
 emungendis solummedo crumenis addictum fuerit, nihil autem reipsa
 vel, quod collaudandum foret, parum præstiterit. Ac neq, hoc adeo
 condolendum forsân existeret, nisi, præter ejusmodi rapinas, tot homi-
 num cædes, ac homicidia Respublicæ clamarent; Proh dolor! quæ
 ab Agitis his interfecti? Quot in extremam pauperiem simul, ac
 corporis calamitatem, acti? quot in floridâ juventute præmaturæ ne-
 sunt traditi? Medicinam, in manu inscii positam, esse gladium in ma-
 nu furiosi, quis nescit? At, quid furiosus? mactabit, non defendet
 occidet, non proteget; lædet, non sanabit. Ita igitur hi, omni arro-
 gantia, ac fastu, referti, Præceptiones omnes Medicas illudentes, Indi-
 cationes, ad curationis viam instituendam necessarias, negligentes, con-
 currentium Symptomatum observationes despicientes, etatum, tempe-
 raturarum, climatum, anni temporum, ac constitutionum, imò & cau-
 sarum prægressarum vix ullam rationem habentes, vespertilionum mo-

re in Medicinam involant. Et reverà plaga est hæc Hominum, justæ Dei Judicio iis hominibus irrogata, qui sese à Veræ Medicinæ Legibus, Præceptis, Fide, ac Experimentis, subtrahentes, hisce Aucupibus Corpora sua credunt.

THES. LV.

Et sic tandem verum esse experimur, quod dicitur: *Dato uno absurdo, sequuntur Plura*; Et, si Medici ipsi in tantos rapiantur Abusus, quid mirum, si, ex malo Exemplo, idem faciant & alii; Sic enim omnes runt, ac dissolvuntur *Bonæ leges*! Sic nullus amplius observatur *Medicinalis ordo*! Ita quidem, ut iis etiam nonnunquam in Locis, unde abusûs istius emendationes expectandæ erant, exlex quilibet sit, vel esse tamen velit; nec ulla extet *Medicinalium Taxa*, nec tot annorum spatio habeatur *Pharmacopoliorum Visitatio*, sed rerum *Medicinalium* omnium extrema suboriatur confusio!

THES. LVI.

Quam tamen Morum, & Geniorum Dyscrasiam, easque quæ exinde promanare assolent, inconvenientias, & exorbitantias maxime detestantur, & abhorrent quibus *Proximi Salus*, *Posteritatis amor*, & *Bonum publicum* cordi magis est, quam ut ipsos purum purum, & sordidum istud *Privatum Commodum* occæcare planè valeat, atque adeò unanimi voto mecum vovent, ut in pristinum restituatur *Ars*; Tandem!

Sit Pudor, & tandem Veri Respectus & Æqui!

Et hæc sunt, quæ de Singularibus dietis dicere constitui. Quæcumque autem de moderno istorum pariter, quam Nobilissimæ Chymie Abusu incidenter passim dixi, bono (sanctè testor) dixi animo! atque adeò solenniter protestor, me contra sincerum Veræ Chymie exercitium, nec dixisse quicquam, nec unquam dicendi habuisse animum; Si quis verò est, cujus

Conscia Mens falsi de se putat omnia dici,

Is secum habitet, ac consideret, in quantam, per tot, tantosque Abusûs, Medicina, & Moderna præprimis Praxis, abierit hætenus Barbariem! atque ita nec Vitio, nec Invidiæ mihi vertat, quòd dixerim, quod Verum, & palàm est Omnibus.

COROLLARIA.

I.

*Galen. in li-
bro ad Tl. 7. 1.
sibul.*

Ars Medica (utpote quæ Unicum habet Subjectum, Unicum Finem, Unicamque Methodum) *Una est*; & *Medicina* vocatur;

II.

Ergò *Medicina Galenica*, & *Spagirica* dicta, non differunt Specie; & consequenter

III.

Utriusque Medicinæ Doctoris Titulus valde dubius est.

IV.

In Morborum Curatione idem fere Processus, qui in Forensi datur Judicio; excepto solo Leuterandi, & Appellandi Beneficio;

V.

Reus est *Æger*, vel *Patiens*; *Actor* est *Morbus*; *Testes* sunt *Signa Morborum*; *Patronus* Causæ, vel *Advocatus*, est *Natura*; & *Judex* tandem est *Medicus*.

VI. Sic

VI.

Sicut autem in Forensi Judicio facile absolvi dicitur, qui *Favorabilem* habet *Judicem*; sic tunc etiam curatur *Patiens*, qui *Favorabilem*, hoc est, *Rationalem*, & *Methodicum* habet *Medicum*.

VII.

Rationalis verò *Medicus* non *Gravis*, & *Reverus* *Judex* est; sed quemadmodum in aliis; sic etiam in ferendo judicio, & dicendâ, super *Morbi* eventu, sententiâ, non *temerè*, nec *precipitanter*, sed *cautè* procedit, & *Rationaliter*;

VIII.

Atque adeò, cum *Morborum Acutorum* Hippocrates Sect. 2. Aphor. 19. non certas omnino, neque *Mortis*, neque *Salutis* esse predictiones, noverit;

IX.

In *Non Acutis*, & *Morbis* quibusvis certi quicquam circa eventum indifferente prædicere, ac divinare, absurdum;

X.

Plerisque autem *Ægrotantibus*, vel nullo etiam

etiam apparente lethali signo, mortem præcere, suspectum esse, fatetur;

XI.

Omne enim imminentis Mortis Prægnosticum, absque lethali signi apparentiâ latum, falsum, & temerarium est.

XII.

Qui Dolorem capitis diuturnum, & per menses aliquot durantem, à Cerebri Exulceratione provenisse, statuit, absque fundamento statuit.

